

Kalaallit Nunaat tamakkerlugu nunaqarfiit ineriartortinneqarnissaannut ukioq 2050-imut pilersaarummik kingusinnerpaamik UKA 2027-mut suliaqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersaarummi sullissinernut tunngaviusunut, attaveqaasersuutitut, inuussutissarsiornikkut periarfissanut pitsaasunillu ineqarnissamut naligiimmik periarfissaqarnissaq qitiutinneqassapput.

(Inatsisartunut ilaasortaq Kuno Fencker, Naleraq)

Akissuteqaat

(Ineqarnermut, Attaveqaasersuutitut Isorliunerusunullu Naalakkersuisoq)

Aappassaanneerreqarnera

Naalakkersuisut sinnerlugit Sanaartornermut Ataatsimiititaliaq siunnersuut kajumittumik suliarisimammagu aammalu ataatsimiititaliap isumaliutissiissuteqarneranut qutsavigaara.

Naalakkersuisut maluginiarpaat ataatsimiititaliap isumaqatigiittup allannguutissatut siunnersuutit matuma akuerineqarnissaa inassutigigaat:

”KANUNUPE kommunillu peqatigalugit isorliunerusunut iliuusissatut pilersaarummik suliaqarnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Pilersaarummi inuuniarmi atukkanik tigussaasunik sullissinernullu tunngaviusunut pitsanngorsaanissaq qitiutinneqassaaq kiisalu sumi qanorlu ilinniartitaanikkut, niuernikkut, aalisarnikkut, suliffeqarnikkut, nukissiuuteqarnikkut, attaveqaasersuuteqarnikkut peqqinnissakkullu aningaasaliisoqassanersoq ineriartortitsisoqassanersorlu nassuiaasiorneqassaaq.”

Isorliunerusunut Naalakkersuisoqarfiit akimorlugit suliniuteqaqatigiit suliaat ingerlasut, Naalakkersuisoqarfinni suliaqarfiit akimorlugit ineriartortitsinissamut suliniutinik ataatsimoortitsinissamik nukittorsaanissamillu siunertaqartut, ataatsimiititaliap isumaliutissiisummini akuersaarai, Naalakkersuisut naammagisimaarlugu maluginiarpaa.

Najukkani inuiaqatigiit piujuarnissaat ingerlasinnaassusaallu qulakkeerniarlugit, nunaqarfiit ineriartornerannut tamakkiisunik isiginnittumik aallaaveqarnissaq pisariaqartoq, ataatsimiititaliap naliliinera Naalakkersuisut isumaqatigaat.

Nunatsinni isorliunerusut siunnerfilimmik pingaarnersiunermit salliutinneqarnissaat, aammalu siunissami aningaasaliinerit sumiiffinni taakkunani pisariaqartitat annertunerusumik takuneqarsinnaanissaat, qitiulluinnarpoq.

Naalakkersuisut aammattaaq naliliipput, ataatsimiititaliap allannguutissatut siunnersuutaa suliaqarnermut, isorliunerusunut iliuusissanut pilersaarummik suliaqarnikkut aallartinneqareersumut, naapertuuttoq aammalu allannguutissatut siunnersuut suliniutissamut periusissatigut anguniakkat erseqqissarnissaannut iluaqutaassasoq.

Tamanna tunngavigalugu Naalakkersuisut ataatsimiititaliap isumaqatigaat, taannalu akuerineqassasoq inassutigalugu.